

元史卷九十九

明翰林學士亞中大夫知制誥兼修國史宋

濂等修

兵志第四十七

兵二

宿衛

宿衛者天子之禁兵也元制宿衛諸軍在內而鎮戍諸軍在外內外相維以制輕重之勢亦一代之良法哉方太祖時以木華黎赤老溫博爾忽博爾朮爲四怯薛領怯薛歹分番宿衛及世祖時又設五衛以象五方始有侍衛親軍之屬置都指揮使以領之而其後增置改易

於是禁兵之設殆不止於前矣夫屬橐鞬列宮禁宿衛之事也而其用非一端用之於大朝會則謂之圍宿軍用之於大祭祀則謂之儀仗軍車駕巡幸用之則曰扈從軍守護天子之帑藏則曰看守軍或夜以之警非常則爲巡邏軍或歲漕至京師用之以彈壓則爲鎮遏軍今總之爲宿衛而以餘者附見焉

四怯薛 太祖功臣博爾忽博爾朮木華黎赤老溫時號掇里班曲律猶言四傑也太祖命其世領怯薛之長怯薛者猶言番直宿衛也凡宿衛每三日而一更申酉戌日博爾忽領之爲第一怯薛卽也可怯薛博爾忽早

絕太祖命以別速部代之而非四傑功臣之類故太祖以自名領之其云也可者言天子自領之故也亥子丑日博爾术領之爲第二怯薛寅卯辰日木華黎領之爲第三怯薛巳午未日赤老溫領之爲第四怯薛赤老溫後絕其後怯薛常以右丞相領之凡怯薛長之子孫或由天子所親信或由宰相所薦舉或以其次序所當爲卽襲其職以掌環衛雖其官卑勿論也及年老旣久則遂擢爲一品官而四怯薛之長天子或又命大臣以總之然不常設也其它預怯薛之職而居禁近者分冠服弓矢食飲文史車馬廬帳府庫醫藥卜祝之事悉世守

之雖以才能受任使服官政貴盛之極然一日歸至內
庭則執其事如故至於子孫無改非甚親信不得預也
其怯薛執事之名則主弓矢鷹隼之事者曰火兒赤昔
寶赤怯憐赤書寫聖旨曰扎里赤爲天子主文史者曰
必闍赤親烹飪以奉上飲食者曰博爾赤侍上帶刀及
弓矢者曰云都赤闕端赤司闕者曰八刺哈赤掌酒者
曰荅刺赤典車馬者曰兀刺赤莫倫赤掌內府尚供衣
服者曰速古兒赤牧駱駝者曰帖麥赤牧羊者曰火你
赤捕盜者曰忽刺罕赤奏樂者曰虎兒赤又名忠勇之
士曰霸都魯勇敢無敵之士曰拔突其名類蓋不一然

皆天子左右服勞侍從執事之人其分番更直亦如四
怯薛之制而領於怯薛之長若夫宿衛之士則謂之怯
薛歹亦以三日分番入衛其初名數甚簡後累增爲萬
四千人揆之古制猶天子之禁軍是故無事則各執其
事以備宿衛禁庭有事則惟天子之所指使比之樞密
各衛諸軍於是爲尤親信者也然四怯薛歹自太祖以
後累朝所御幹耳朶其宿衛未嘗廢是故一朝有一朝
之怯薛總而計之其數滋多每歲所賜鈔幣動以億萬
計國家大費每敝於此焉

右衛 中統三年以侍衛親軍都指揮使董文炳兼山

東東路經略使共領武衛軍事命益都行省大都督撒吉思驗壬子年已定民籍及照李壇總籍軍數每千戶內選練習軍士二人充侍衛軍并海州東海漣州三處之軍屬焉至元元年改武衛爲侍衛親軍分左右翼置都指揮使八年改立左右中三衛掌宿衛扈從兼屯田國有大事則調度之

左衛

中衛 並至元八年侍衛親軍改立

前衛 至元十六年以侍衛親軍創置前後二衛掌宿衛扈從兼營屯田國有大事則調度之置都指揮使

後衛 亦至元十六年置

武衛 至元二十五年尚書省奏那海那的以漢軍

萬人如上都所立虎賁司營屯田修城隍二十六年樞密院官暗伯奏以六衛六千人塔刺海孛可所掌大都屯田三千人及近路迤南萬戶府一千人總一萬人立武衛親軍都指揮使司掌修治城隍及京師內外工役之事

左都威衛 至元十六年世祖以新取到侍衛親軍一萬戶屬之東宮立侍衛親軍都指揮使司三十一年復以屬皇太后改隆福宮左都威衛使司至大三年選其

軍之善造作者八百人立千戶所一及百戶翼八以掌之而分局造作皇慶元年以王平章舊所領軍一千人立屯田至治三年罷匠軍千戶所

右都威衛 國初木華黎奉太祖命收扎刺兒兀魯忙兀納海四投下以按察兒孛羅笑乃斛不里海拔都兒闊闊不花五人領探馬赤軍旣平金隨處鎮守中統三年世祖以五投下探馬赤立蒙古探馬赤總管府至元十六年罷其軍各於本投下應役十九年仍令充軍二十一年樞密院奏以五投下探馬赤軍俱屬之東宮復置官屬如舊二十二年改蒙古侍衛親軍指揮使司三

十一年改隆福宮右都威衛使司

唐兀衛 至元十八年阿沙阿東言今年春奉命總領河西軍三千人但其所帶虎符金牌者甚衆征伐之重若無官署何以防閑之樞密院以聞遂立唐兀衛親軍都指揮使司以總之

貴赤衛 至元二十四年立

西域親軍 元貞元年依貴赤唐兀二衛例始立西域

親軍都指揮使司

衛候直都指揮使司 至元元年裕宗招集控鶴一百三十五人三十一年徽政院增控鶴六十五人立衛候

司以領之且掌儀從金銀器物元貞元年皇太后復以
晉王校尉一百人隸焉大德十一年益以懷孟從行控
鶴二百人陞衛侯直都指揮使司至大元年復增控鶴
百人總六百人設百戶所六以爲其屬至治三年罷之
四年以控鶴六百三十人歸于皇后位下後復置立
右阿速衛 至元九年初立阿速拔都達魯花赤後招
集阿速正軍三千餘名復選阿速揭只揭了溫怯薛丹
軍七百人扈從車駕掌宿衛城禁兼管潮河蘇沽兩川
屯田并供給軍儲二十三年爲阿速軍南攻鎮巢殘傷
者衆遂以鎮巢七百戶屬之并前軍總爲一萬戶隸前

後二衛至大二年始改立右衛阿速親軍都指揮使司
左阿速衛 亦至大二年改立

隆鎮衛 睿宗在潛邸嘗於居庸關立南北口屯軍徼
巡盜賊各設千戶所至元二十五年以南北口上千戶
所總領之至大四年改千戶所爲萬戶府分欽察唐兀
貴赤西域左右阿速諸衛軍三千人并南北口大和嶺
舊隘漢軍六百九十三人屯駐東西四十三處立十千
戶所置隆鎮上萬戶府以統之皇慶元年始改爲隆鎮
衛親軍都指揮使司延祐二年又以哈兒魯軍千戶所
隸焉至治元年置蒙古漢軍籍

左衛率府 至大元年命以中衛兵萬人立衛率府屬之東宮時仁宗爲皇太子曰世祖立五衛象五方也其制猶中書之六部殆不可易遂命江南行省萬戶府選漢軍之精銳者一萬人爲東宮衛兵立衛率府延祐元年改爲忠翊府未幾復改爲御臨親軍都指揮使司又以御臨非古典改爲羽林六年英宗立爲皇太子復以隸東宮仍爲左衛率府

右衛率府 延祐五年以詹事禿滿迭兒所管速怯那兒萬戶府及迤東女直兩萬戶府右翼屯田萬戶府兵合爲右衛率府隸皇太子位下

康禮衛 武宗至大三年定康禮軍籍凡康禮氏之非者皆別而黜之驗其實始得入籍及諸侯王阿只吉火郎撒所領探馬赤屬康禮氏者令樞密院康禮衛遣人乘傳往置籍焉

忠翊侍衛 至元二十九年始立屯田府大德十一年增軍數立爲大同等處侍衛親軍都指揮使司至大四年四月皇太后修五臺寺遂移屬徽政院并以京兆軍三千人增入延祐元年改中都威衛使司仍隸徽政院至治元年始改爲忠翊侍衛親軍都指揮使司

宗仁衛 至治二年右丞相拜住奏先脫別鐵木叛時

沒入亦乞列思人一百戶與今所收蒙古子女三千戶
清州徹匠二千戶合爲行軍五千請立宗仁衛以統之
於是命右丞相拜住總衛事給降虎符牌面如右衛率
府又置行軍千戶所隸焉

右欽察衛 至元二十三年依河西等衛例立欽察衛
至治二年分爲左右兩衛天曆二年以本衛屬大都督
府

左欽察衛 亦至治二年立始至元中立衛時設行軍
千戶十有九所屯田三所大德中置只兒哈郎鐵哥納
兩千戶所至大元年復設四千戶所至是始分爲左右

二衛亦屬大都督府

龍翊侍衛 天曆元年十二月立龍翊衛親軍都指揮使司以左欽察衛唐吉失等九千戶隸焉

虎賁親軍都指揮使司

左翊蒙古侍衛親軍都指揮使司

右翊蒙古侍衛親軍都指揮使司

宣忠幹羅思扈衛親軍都指揮使司

威武阿速衛親軍都指揮使司

東路蒙古侍衛親軍都指揮使司

女直侍衛親軍萬戶府

高麗女直漢軍萬戶府管女直侍衛親軍萬戶府

鎮守海口侍衛親軍屯儲都指揮使司

宣鎮侍衛

世祖中統元年四月諭隨路管軍萬戶有舊從萬戶三哥西征軍人悉遣至京師充防城軍忙古解軍三百一十九人嚴萬戶軍一千三百四十五人濟南路軍一百四十人脫赤刺軍一百四十九人乣查刺軍一百四十五人馬總管軍一百四十四人三年十月諭益都大小管軍官及軍人等先李璫懷逆蒙蔽朝廷恩命驅駕爾等以爲已惠爾等雖有效過功勞殊無聞報一旦泯